

四庫全書

史部

欽定四庫全書

史部

欽定平定臺灣紀畧卷十八

內閣中書<sub>臣</sub>沈颺復勸

武英殿纂修中書<sub>臣</sub>彭元琬

欽定四庫全書

欽定平定臺灣紀略卷十六

五月初三日已藍元枚奏言浙兵前到蚶江尚需  
時日浮山民社搶奪甚至拆毀房屋砍伐樹木若  
不嚴加究辦各處皆將效尤其林吳二姓械鬪係  
三月中事現在稍覺止息且此夥內牽連長泰平  
和等縣天地會奸匪若遽行辦理恐即激成事端  
現當違勒臺匪之時應暫且緩辦至許姓搶奪不

過無賴棍徒應先行辦理庶可懲一儆百是以臣  
暫留漳浦辦理一面密咨督臣如浙兵到蚶江先  
令陸續配渡計浙兵全到時臣亦可辦完星即趕  
赴蚶江帶領前往鹿仔港尚不致遲悞

同日琅玕奏言浙省原派兵四千名欽奉

諭旨止須調兵三千名當查添派之衢州鎮兵一千名  
已於初九日全數出境温州黃巖鎮兵各一千名  
亦已在途令即跟接前進以足三千名之數其提

標及鎮海營兵一千名因距閩較遠是以行程在後即經行令撤回旋准提臣陳大用札會該兵等行抵溫州奉到行知即飭令歸伍其溫州黃巖鎮兵二千名跟接前進俱于十八日全數出境又先准督臣李侍堯札會奏撥浙省米十餘萬石經臣于附近各海口之杭州嘉興湖州寧波紹興溫州台州七府屬酌撥倉穀二十萬石碾米十萬石派員由海運赴閩嗣據嘉興府鄭交泰乍浦同知方

受疇等稟報該處封催海船百餘隻每船僅裝米  
五百石內有挑出陳舊不堪應用者二十餘隻現  
在不敷裝運等情臣當查乍浦海口與江南上海  
口相距百餘里往來船隻甚為近便隨一面札會  
江蘇撫臣閔鶚元一面逕行飛飭江蘇松太道立  
即於上海口岸代催船隻旋據該道催覓海船三  
十隻委員星夜押赴乍浦當即趕緊裝載足數應  
用所有杭嘉湖三府屬米五萬石已于五月初二

日由乍浦海口全數開行其紹興寧波府屬米石  
據報現在裝載開行温州台州府屬米石亦據稟  
由該縣陸續起運其至海口開行日期因離省稍  
遠尚未據該府報到臣先已委員往催限于夏至  
節前務令全數出口似可不致遲悞再此時相距  
秋收尚遠本年浙省春收尚為豐稔米價亦漸次  
平減倘閩省再須採買籌備一俟督臣李侍堯撫  
臣徐嗣曾酌議知會到時即飭令各該地方妥協

照料並嚴察訪查奸商囤戶如有乘機囤積抬價  
居奇情事即行嚴拏從重辦理不敢稍存姑息均  
奏入

上命軍機大臣傳諭常青李侍堯藍元枚琅玕曰漳浦  
縣許姓搶奪一案李侍堯自能辦理現在臺灣北路  
鹿仔港最關緊要着藍元枚即遵前旨迅赴鹿仔港  
辦事無庸在漳浦留滯李侍堯原調浙兵本係四千  
今雖減去一千但朕已為添調福州駐防兵一千名



不特所調兵丁仍符原調之數且該處駐防兵雖不  
及京城健銳火器各營之精壯然較之浙兵柔懦其  
勇往堅定不啻數倍更為得力該處勦賊情形常青  
于四月二十七日奏到後迄今又經數日未經續奏  
朕盼望軍報綦切着該將軍務將此數日內勦賊情  
形續行具奏以慰廑念再賊匪攻擾鳳山時尚帶兵  
二千餘名前據常青奏潰回者計七百餘名其餘一  
千三百餘名作何下落兵丁臨陣逃脫皆應按律正

法但念人數衆多繫予駢誅在朕心究有不忍此項  
兵丁若祗逃亡潰散將來只須查明為首者數人正  
法其餘尚可免死分別發遣若去而從賊甚至隨同  
抗拒官兵則竟不可一名寬貸矣賊黨與官兵抗拒  
其罪尚在不赦況身隸行伍既經臨陣潰逃復敢從  
賊肆逆此而不嚴行辦理何以昭憲典而肅戎行着  
常青俟事竣後嚴查遵辦不可稍存姑息又據琅玕  
奏于浙東浙西撥倉穀碾米十萬石解閩本年浙省

春收豐稔米價平減倘閩省再須採買籌脩一俟李  
侍堯等知會到時即妥協辦理恰與昨降諭旨相合  
如此留心殊屬可嘉現在閩省內地及臺灣支給口  
糧撫恤難民均須米石應用多多益善自應如此寬  
為籌脩俾兵糧民食均資充裕並當先行出示則奸  
商不致囤積居奇亦權變一法也若李侍堯酌量閩  
省尚須接濟即一面奏聞一面咨撥以期無悞民食  
方為妥善

同日孫士毅奏言現需酌撥銀三四十萬兩解赴閩省應用伏思閩省集兵勦匪需用較多自應迅速解往但自潮至省往返二千餘里行文免解必須半月以外頭批方得到潮是以臣即就近在潮州運同衙門應解鹽課及廣濟橋關稅並存貯府庫急需各項內湊撥銀十萬兩選派委員即于四月十七日自潮起程先行解赴閩省備用臣仍一面飛咨省城酌撥起解接續前進查粵海關上年

徵收正襍銀九十餘萬兩正值四月起解之期一切裝銀器具及委員人等俱經早為齊備應請於此項內撥出銀四十萬兩解閩即可迅速起程臣現將在潮撥借之十萬兩查明內有六萬兩係應行解省之項即令藩運兩司扣存抵兌其餘三十四萬兩即交原派解京之員一并解潮赴閩并知會撫臣圖薩布監督臣佛寧如關餉已交委員承領尚未開行即一面分撥一面起解如前批業已起

程即將後批截留改撥設起解已經過半截留不足四十萬兩即於藩庫留存鹽課項下撥足解閩另行分別造冊咨部似此通融籌撥庶起運不致遲延而閩省得以早資接濟奏入報

聞

初五日辛未徐嗣曾奏言本月初十日馳抵入境首

站之福鼎縣值浙江頭起官兵三百名亦於是日到站臣督同延建邵道元克中及該府縣照料前

進至十五日統計福鼎縣過站已有一千五百名  
嗣奉

諭旨令福州將軍恒瑞即于駐防滿兵內挑選一千名  
統領前赴臺灣會勦所有口糧等事宜飭臣妥為  
料理即飛檄在省司道暨廈防同知先將應需口  
糧船隻等項妥協辦理臣兼程馳回於十九日到  
省其駐防官兵並軍械一切先經恒瑞預期派撥  
業於十六十八等日點發二起每起二百五十名

臣即會同恒瑞於二十日將三起兵丁逐一點發  
察看該兵等踴躍奮勉較之綠營實覺不同二十  
二日全行起程出省統計月內俱到廈門船隻已  
據具報催脩齊全可以隨到隨渡臣查常青到臺  
灣適在鳳山失律之際人心藉以安定激勵官兵  
義民屢次奮勇殺賊三月二十七八等日尤大挫  
賊鋒柴大紀亦於二十九日賊匪率衆攻犯諸羅  
大加剿殺現在粵兵得有順風據臺防同知楊廷



理等稟報到郡已有一千五百名至浙省官兵准  
督臣李侍堯咨會以閩省各營上年挑剩之兵再  
於短中抽長轉恐不如浙省預脩戰兵較為得用  
奏請仍調溫衢等處官兵配渡進剿等因咨臣查  
照辦理查浙兵三千名不日皆可陸續到省酌以  
五百名為一起俟滿兵起身後即於二十三日按  
起趲赴泉州一路不致擁擠行走自較安速臣在  
省一面照料各路官兵挨次進發一面將秋審及

一切緊要事件趕緊查辦即馳赴泉州料理配渡  
現准督臣李侍堯咨會平和等處有匪徒械鬪之  
事漳浦縣浮山社亦有許姓多人搶奪之案查藍  
元枚現在奉

命帶兵前赴臺灣會勦李侍堯駐劄泉州籌辦要務臣  
俟到泉州與李侍堯商酌如此案尚未完竣臣即  
親赴查辦又前經飭臣親往嚴緝粵省咨拏會匪  
朱洪德洪李桃等犯飛行汀漳龍道朱芑會先往

查緝旋據稟覆龍溪縣並無朱洪德及洪李桃和  
尚亦無福蓮寺臣思該犯等狡黠異常所供夥黨  
姓名住址多不以實未便於臺匪未靖之先紛紛  
搜捕致涉張皇一切仍俟會晤督臣李侍堯面商  
妥辦期無貽誤至福寧一帶沿海口岸巡防尚為  
嚴密雨水調勻田禾暢發官兵過境並無絲毫擾  
及閭閻體訪民情俱極安堵臣往來漳泉仍隨時  
馳回省城趕辦一切於地方事件兩不致誤奏入

上命軍機大臣傳諭常青李侍堯藍元枚徐嗣曾曰官兵分起配渡均經定有章程且粵兵業經過竣浙兵挨次進發儘可交地方官辦理毋庸李侍堯親身在彼照料如此時漳浦地方所獲許姓各犯尚未辦竣李侍堯即星赴該處就近辦理兼資彈壓如許姓各犯業經辦竣漳州現有總兵常泰在彼毋庸李侍堯親往督辦該督亦不必再往即在廈門一帶辦理渡兵之事其餘邪教人犯自應事平後再辦為是至臺

灣剿捕事宜若常青不往事不可知此實

上天牖啓朕衷倍深感激目下粵兵早已全到其駐防滿  
兵亦可續到浙兵諒亦陸續配渡常青自當酌量先  
到弁兵足敷簡調剿捕即躬親統率廓清後路直搗  
賊巢但該將軍於四月二十七日將三月二十七  
九等日剿賊情形具奏後迄今又隔數日着即將二  
十九以後曾否與賊打仗及現在如何籌辦剿捕賊  
匪各情形迅速馳奏

初八日

甲戌

常青奏言首逆林爽文潛回大里杙賊

巢而南路賊黨仍敢猖獗臣即欲乘賊衆敗逃之時迅速窮追截殺惟因差探南北賊窩路徑尚未得其詳悉且現存府城兵丁不過二千餘名又因鳳山再失其氣少餒急切用之未必得力是以督率將備各帶兵丁先在附近村庄逐處搜捕初三初十十四等日在大洲等處攻剿賊巢鎗砲打死賊匪百餘人割獻首級十餘顆奪獲鎗砲旗牌等

械並將賊巢焚燬臣正在需兵接濟間接督臣李  
侍堯札知已預調粵省兵四千名極為迅速得力  
內二千五百名係南澳鎮總兵陸廷柱帶領進鹿  
耳門一千五百名由鹿仔港進口高廉鎮總兵梁  
朝桂帶隊會剿而浙省之兵亦經飛調軍威倍壯  
賊衆自可一鼓殲擒惟是察看臺灣南北路賊勢  
雖首逆林爽文現在大里杙巢穴固應直攻北路  
但南路賊黨莊大田等烏合之衆不下萬餘近又

據南淡水都司邵振綱稟稱賊匪往來攔阻上下  
信息現與叅將瑚圖里極力堵禦等語若臣遽往  
北路不惟鳳山等處益被擾害亦恐乘虛復來犯  
郡轉為肘腋之患至鹿仔港原有兵三千八百名  
今又添粵省兵一千五百名諸羅原有兵二千名  
近查柴大紀堵禦北路賊匪且與賊巢相近兵力  
稍單臣現派叅將潘韜等帶原調到之提標金門  
銅山各營兵一千一百餘名前往協助並飭普吉



保與柴大紀訂期夾攻斗六門該二鎮若即將道路打通約共有兵八千復與副將徐鼎士帶赴北淡水之兵互為應援則現在鹿仔港諸羅二處俱可防禦無虞臣再四熟籌必須先將南路剿除淨盡然後乘勝疾趨北路大里杙一帶以全力專注自不難掃穴擒渠茲南澳鎮總兵陸廷柱已於十三日到臺灣所帶兵船尚有五六百名在彼一俟粵兵盡數前來以及浙省兵齊到臣即親自總統

官兵先往南路自大湖大小岡山小店仔排子頭  
茄藤各險要以至相近內山之淡水溪山猪毛水  
底寮羣賊佔踞之處搜尋撲滅則鳳山縣城可以不煩兵力自然收復至前日雖有投順之莊錫舍

臣謹凜遵

訓示受降如受敵仍復時加稽察不敢稍有疎忽並於  
臣進剿南路之時飛檄柴大紀普吉保等奮力攻  
擊首逆林爽文大里杙巢穴使北路之賊有所牽

制不敢赴南路援救則南路之賊自可盡力殲除  
并不使賊匪逸入內山致有與生番勾結情事再  
查叅將瑚圖里前於進剿南路時經郝壯猷派往  
南淡水接應都司邵振綱官兵因鳳山復陷是以  
該員尚在山猪毛汛協同堵禦臣到臺灣後業將  
已行正法人犯開具名單附奏茲復續獲賊夥以  
及沿海搶劫臨陣脫逃各犯逐一訊明俱非賊目  
即行正法繕具名單恭呈

御覽再初九日接據柴大紀稟報三月二十九及四月初四等日賊匪侵擾諸羅縣城該鎮督率官兵并民番人等協力剿捕將賊衆殺敗鎗砲打死賊數百人生擒匪犯蔡瑞等十一名斬賊首級三十餘顆奪獲鎗砲旗牌等項詳察柴大紀尚不敢因循懈弛但斗六門道路未通一切文報俱由海道往來竟非一日此皆由黃仕簡任承恩坐守不前柴大紀亦不免少有觀望臣惟有仰懇

聖恩令其帶罪軍營奮勇殺賊以贖前愆再臺灣將弁  
員缺令臣於出力弁兵內酌予擢用臣惟核其實  
在勞績以獎有功并嚴查增數謊報等弊以期信  
賞必罰至堪勝陸路提督員缺容臣與督臣李侍  
堯札商會奏奏入

上命軍機大臣傳諭常青李侍堯曰常青奏酌籌剿賊  
先後事宜所見俱合機要至賊黨雖有萬餘不過么  
厝烏合一俟擒獲賊首林興文餘黨自必紛紛潰散

勢如摧枯拉朽無難撲滅淨盡蓋聚易者散亦易原  
不虞其多也此時粵兵計已全抵臺灣駐防滿兵及  
浙兵亦即陸續到彼軍威壯盛常青即可親自總統  
廓清南路賊匪乘勝直搗賊巢生擒逆首林爽文迅  
奏膚功承受恩眷朕盼望捷音宵旰懸切該將軍務  
遵前旨隨時奏報再常青奏到審明正法續獲賊夥  
以及沿海搶劫脫逃各犯單內有梁必進係撥防鳳  
山臨陣脫逃之犯前據常青奏潰回者計七百餘名

其餘一千三百餘名尚無下落是臨陣脫逃者不止  
梁必進一犯此等逃兵前經傳諭常青李侍堯俟事定  
後嚴查實在逃逸者即照金川逃兵之例辦理但此時經  
隨時拏獲訊係脫逃之犯自當即行正法示衆若此時概  
將逃兵全行查辦該犯等自知法所難宥轉致去而從賊  
於事大有關係著常青此時先密為存記俟軍務告竣  
再行確切查明遵照嚴辦賊匪未靖之先不可稍露  
端倪也至柴大紀於賊衆攻搶諸羅時復能督率官

兵民番協力殺死賊匪數百生擒匪犯蔡瑞等十一  
名正法尚知感激奮勉勇往出力前經降旨令其暫  
署水師提督以資策勵續經降旨將任承恩所遺陸  
路提督一缺諭令常青會同李侍堯於帶兵打仗總  
兵內擇其最為出力者保奏一人候朕簡放矣着該  
將軍仍遵前旨於柴大紀普吉保二人孰為奮勉出  
力據實會同東公保奏一人候朕另行降旨補授以  
示鼓勵再莊錫舍殺賊立功以圖自効固屬誠心而



所屬二千餘人其中豈皆可信此等新降之人究不免心生疑貳見官兵勢盛連得勝仗自必懾伏威稜始終出力設我兵稍不順遂即恐心懷疑貳常青於領兵攻剿時不可心存大意務須慎之又慎揀選勇往得力素為賊所畏憚將備伴押莊錫舍同行以防萬一不虞即可先發以制有備無患仍勿稍露端倪致滋疑畏至莊大田現為賊目糾約萬餘人肆出滋擾最為不法該犯與林興文同謀互為聲援且籍隸

漳州自不肯遽行投順但莊大田將來或見林爽文  
勢日窮蹙官兵聲勢愈盛而莊錫舍投誠後復邀官  
職之榮欲效莊錫舍所為率衆投誠亦事理所有此  
等奸狡光徒心懷叵測總不可信如果伊等棄械投  
出若拒而不納堅其負固死守之心既非權宜應變  
之道若輕信受降聽其隨營自効則伊等黨羽衆多  
勢難防範倘或該犯等自知罪重野性難馴乘隙生  
心別有竊發內應情事即不致有意外之虞而兵心

已先為其所亂甚屬不成事體此處最難措置得宜  
惟在常青時刻留心相度情形隨機應變或權時受  
納設法解散俾官兵之力足以鉗制管束伊等無從  
生變或將伊等陸續送回內地設法辦理以杜後患  
而傲兇頑若降者不拒設或林爽文將來勢窮投出  
豈亦貸其死命置之不辨乎常青於此等處務須加  
倍慎重再四留心斟酌以期妥善此時切不可稍露  
端倪不但不可使賊匪聞知即投降之莊錫舍等亦

不可稍有洩漏致滋疑貳又前經派出之侍衛章京  
八員皆係曾經行陣奮勇之人駐防滿兵昨據徐嗣  
曾奏起程時人人勇氣百倍粵兵亦向稱勇健常青  
率領此項奮勇官兵廓清後路直搗賊巢擒獲首逆  
剿除夥黨自無難一舉集事但一切善後事宜尤須  
擘畫周詳如查辦逃兵安置降人搜捕餘黨清釐地  
界酌建城垣等事均關緊要或酌看該處情形有須  
添設文武員弁以資控制撫馭之處均須逐一籌酌

悉心辦理以期一勞永逸綏靖海疆常青受朕委任  
全在伊一人籌辦妥善即稍遲數月來京瞻覲亦不為  
遲斷不可急於啓程致有疎漏

初十日

丙子琅玕奏言閩省押解臺灣逆匪林小文

四犯據衢州府知府舒慶雲稟報至江山縣地方  
廖攀龍一犯兩脚發腫飲食少進臣隨飭撥醫委

員帶往迎赴前途隨路醫治務痊仍令嚴行督押  
晝夜兼程前進茲林小文等四犯于四月二十九

日過省驗明廖攀龍病漸痊愈于五月初一日押  
送出浙江境仍移明前途江蘇省一體撥醫隨路  
調治其林家齊一犯先據閩省解到已于四月十  
九日押送出境至章京侍衛烏什哈達等已于四  
月二十六二十七等日先後過杭州省城臣即照  
料迅速前進沿途並無需索均為安靜司道等官  
亦無餽送情事

同日李侍堯奏言漳浦搶奪一案據汀漳道朱光

會稟稱該縣親赴浮山社將搶奪人犯拏獲二十餘名現在嚴緝逸犯等語茲于二十六日接提臣來札亦以許姓聞官府查拏多已逃散其械鬥一案因傷斃人命報縣該縣正在嚴拏兇手不致有不服拘拏等事提臣現擬于數日內即趨赴蚶江是匪徒尚知畏法不致遂成巨案臣已飭該道嚴諭該縣上緊緝捕務使案犯全獲兇徒知警一面札致提臣查辦數日即速到蚶江帶兵赴鹿仔港

再粵兵自三月二十六日及四月初六初九十二等日陸續放洋總兵陸廷柱已于本月十三日到臺灣計此時粵兵四千早已全到本省滿營兵亦將次全抵廈門浙兵亦即隨滿兵之後連日趨行前進計五月初十以內俱可到蚶江廈門兩處配渡提臣來時正可帶領前往昨據普吉保咨稱但能於打仗處出力至於調度籌畫實非所長是普吉保亦自知限於才力不能獨當一面今蒙



諭旨授藍元枚為叅贊令其前赴鹿仔港統領提臣過  
泉州臣當諄切告知一到鹿仔港即相機攻剿勿  
蹈前人觀望該處現有兵三千八百加以浙兵二  
千兵力亦已厚集必可直攻賊巢至內地沿海各  
處臣自當加意訪察於鎮靜之中密為防備不致  
稍有疎虞再本月十八日黃仕簡到廈門經興泉  
永道萬鍾傑委員押送于二十日到泉州臣隨傳  
旨拏問委員即日起解赴京任承恩于二十六日到泉

州臣亦委員即日起解伊二人兩路先後過海並未會面又臣接據常青來咨迟于內地沿海各營酌撥大砲重二三千斤者解赴軍前脩用臣查泉州廈門等營俱有數千斤護城大砲恐年久鏽損不堪應用隨飭各營將領試演挑出十位隨帶鐵子火藥等項委員運解臺灣交常青應用再查鹿仔港正近大里杙大兵既集便當直搗賊巢大砲轟摧最為得力復飭挑撥十位隨帶鐵子火藥等

項運解鹿仔港軍營備用所有解往兩路砲位俱  
造就砲車隨同帶去以便牛隻挽運可省人夫擡  
送至閩省藩庫動撥已多今粵省撥解前來接濟  
尤覺寬裕現准孫士毅咨稱先于潮州鹽課等銀  
內湊撥十萬兩就近起解隨後再從省城撥解三  
十萬兩等因查粵省委員所解十萬兩已于本月  
十八日入閩境臣亦先已派員前往接解不日可  
到泉州又本月二十一日臺灣道永福知府楊廷

樺等遣役解到匪犯廖東阮贊胡番連清水曾錦  
王世昌王大年等七名前來除王大年在途患病  
至打盈地方身故照例戮屍外查廖東一犯據總  
兵柴大紀咨稱在三部竹地方打仗生擒之偽護  
駕大將軍阮贊一犯係克復諸羅後拏獲之偽千  
總胡番一犯係諸羅令陳良翼拏獲之偽督糧官  
連清水一犯係總兵郝壯猷拏獲之偽軍師惟曾  
錦王世昌二名查曾錦係僧人上年柴大紀遣兵

在炭下地方拏獲供出南路賊首王啓郎遣來打探軍情隨即拏到王啓郎收禁經撫臣徐嗣曾據咨具奏奉

旨將王啓郎曾錦解京

臣

到任後據派往臺灣之守備

林登雲稟稱道府等將王啓郎放出并伊弟王世昌同帶義民指引官兵赴南路進攻鳳山臣以王啓郎係曾錦供出南路賊首何以遽行放出隨行文催解據該道府詳稱王啓郎即監生王世英同

伊弟武生王世昌俱住鳳山縣城平日甚屬安分  
上年賊破鳳山時兄弟二人攜帶家口逃至府城  
為曾錦誣供差拘到案質之曾錦亦稱僧人本係  
王啓郎邀在泗洲佛堂作住持後仍被逐出自鳳  
山破後沿途乞食被兵拏獲認為奸細將兩耳割  
去只得自認為軍師並扳王啓郎為賊首等語旋  
據府城紳士游廷元等以王啓郎從前辦理黃教  
時從軍出力實係良民因將王啓郎保出作為嚮

導帶同戰兵在大湖軍前効力拏獲王坑郎等十  
餘名解送郝壯猷營盤又隨同收復鳳山三月初  
一日奉文解京到打狗地方痰壅氣閉當即殞命  
是該道府所稟王啓郎兄弟並無為匪情事兼又  
在軍前出力不惟不應治罪並宜獎賞王啓郎已  
死伊弟王世昌自無庸解京但事關匪案未便草  
率或係該道等一時權宜放出既令其在軍効力  
不免意存迴護亦未可知臣謹將廖東阮贊胡番

連清水四犯先行解京其曾錦王世昌二名暫緩起解一面行文常青確查該道等所稟情節是否屬實咨覆到日再行分別辦理均奏入

上命軍機大臣傳諭常青李侍堯藍元枚曰福建駐防滿兵心力堅定自較綠營為得力應全令由廈門配渡與粵兵四千前往常青處俾統領進剿方為有濟其續到之浙兵應令由蚶江配渡前往鹿仔港交藍元枚帶領摺內未經分晰叙明諒李侍堯在彼派撥



照料自必遵照分別配渡不致舛錯也至藍元枚受  
朕深恩授為叅贊且目擊黃仕簡任承恩觀望遷延  
身獲重譴料伊亦不敢復蹈故轍但該處現有兵三  
千八百名駐劄日久未免師老氣衰而浙省兵丁素  
性脆弱朕所素知不過藉此看守汎地以壯聲威則  
可若臨陣打仗不能得力且鹿仔港逼近大里杙賊  
巢最關緊要若此時藍元枚到彼即領兵進剿直攻  
賊巢無論浙兵柔懦萬一稍有挫損軍心為其動搖

固屬不成事體即幸得勝仗賊匪敗退勢必潰逃四散竄入深山藍元枚所帶之兵斷不能搜剿擒截常青帶領大兵到彼時辦理轉覺費手所謂欲急轉緩於事無濟朕意藍元枚到鹿仔港時祇須會同柴大紀普吉保整頓兵力或往前移駐彰化縣城作為進攻大里杙之勢以牽綴賊勢不能往南而懾伏其胆或能會合柴大紀普吉保先將南北通衢斗六門大武壠等處之佔據賊匪合力剿除以便常青率領各

項奮勇官兵廓清後路乘勝疾趨北路全無阻擋專  
力直搗賊巢自無難一舉蕨功行軍之道緩急先後  
貴于審度機宜權衡悉當有欲速而反遲似緩而轉  
急者所謂行軍貴機變也再漳浦奸民械鬥一案該  
縣已將正犯拏獲二十餘名是此案該地方官即可  
查拏逸犯究辦完結況有總兵常泰在彼足資彈壓  
不但藍元枚應遵照諭旨速赴鹿仔港即李侍堯亦  
須察看情形如不必親往督辦即在廈門蚶江一帶

往來照料渡兵接濟軍需為是至本日李侍堯奏到  
各摺所辦俱合機宜朕心深為嘉慰著賞給大小荷  
包以示獎勵至軍需用項除粵省撥解四十萬兩外  
如尚不敷用該督即據實速奏候朕降旨續撥以資  
接濟

臣等謹案用兵固貴神速尤在知彼知己方能制  
勝提臣藍元枚渡臺懲黃仕簡任承恩之獲謹必  
思迅速攻剿奮勉見功我

皇上計及鹿仔港現存之兵守禦日久未有寸進已師老氣衰而所帶之浙兵二千又素性脆弱打仗不能得力賊首林爽文負隅之勢已成非偏師足以藏功

特諭令牽綴賊勢先剿除斗六門大武隴佔據賊匪以待大兵合力進剿數千里外之情形洞若觀火悉先時密授機宜所以動出萬全事無不集也

欽定平定臺灣紀畧卷十六

欽定四庫全書

欽定平定臺灣紀畧卷十七

五月十一日

丁丑

上命軍機大臣傳諭常青李侍堯藍元枚曰昨據李侍堯奏黃仕簡任承恩業經委員起解伊二人既經送回內地而藍元枚未抵臺灣所有水師陸路兩提督印務是否遵照前旨分交柴大紀普吉保二人署理何以前此常青摺內未經奏明又聞常青初到臺灣

奏到情形摺內稱任承恩雖未能向前但北路避賊  
人民俱在鹿仔港若遽行撤動恐賊人乘虛竊發請  
暫留任承恩帶罪督兵等語常青旣因鹿仔港緊要  
欲留任承恩在彼嗣因接奉諭旨即將任承恩解任  
送回內地是該處止有普吉保一人勢力單薄何以  
常青于送回任承恩時並未將如何傳旨將伊解任  
是否需人協助之處籌畫奏及且閱李侍堯摺內稱  
接據普吉保咨稱但能于打仗出力至調度籌畫實



非所長是普吉保亦自知限於才力不能獨當一面  
等語又似常青令彼暫署任承恩之印矣朕早經慮  
及該鎮到任未久于地方情形未能熟悉且不通閩  
省語音遇有調遣官兵及曉諭鄉勇義民等事恐多  
未便是以諭令藍元枚不必在漳浦留滯速即前赴  
鹿仔港令藍元枚尚未奏報放洋日期而該處止有  
普吉保一人鹿仔港距大里杙賊巢最近恐賊匪聞  
而生心乘虛竊發深為厯念已節次降旨令藍元枚

星速前赴鹿仔港以資守禦昨又念及藍元枚所統  
領之浙省兵丁素性脆弱殊不足恃特諭藍元枚到  
鹿仔港時止須會同柴大紀普吉保整頓兵力遙為  
聲援牽綴賊勢總俟常青到彼定期夾攻藍元枚務  
須凜遵前旨迅赴鹿仔港審察遲速緩急機宜養精  
蓄銳以期併力會剿再常青前奏賊匪佔踞斗六門  
我兵南北兩路信息梗阻此事最關緊要藍元枚尤  
應會同柴大紀普吉保先將斗六門大武隴等佔踞

之賊匪盡力殲除以通南北大路庶常青統兵前進  
全無阻隔可成破竹之勢再常青前次奏到之摺有  
彰化諸羅鳳山等縣被搶掠一空聞官兵將至即捨  
城而去官兵既已入城即以克復城池咨報並聞彰  
化城中仍有賊人往來何得謂之克復等語所奏自  
屬實在情形鳳山一縣得而復失業將郝壯猷治罪  
而彰化諸羅前此柴大紀陳邦光等亦俱稱率領兵  
民奮勇殺退賊匪克復城池亦不免有冒功誑報情

事矣但現在該二縣究竟有無賊匪往來佔踞況從前陳邦光恢復彰化後自必領兵在彼駐劄茲常青查奏該處尚有賊匪往來是陳邦光恢復後又捨此何往斷無與賊同在一城互相坐視之理該鎮將等從前有無藉事鋪張捏飾之處常青何以尚未據覆奏若此時該鎮將等皆知過奮勇効力又當以功贖罪總在常青善為駕馭鼓勵用之而已再副將徐鼎士前經常青等派令帶兵剿賊而該副將復以艤舫

民人懇求留駐尚在未行曾諭常青嚴查該副將有  
無托詞規避之處亦未據查明具奏著常青一併詳  
查不可稍存姑息之見

十二日

戊寅

上命軍機大臣傳諭常青李侍堯藍元枚普吉保曰常  
青初抵臺灣存城兵數無多賊匪分路攻犯府城常  
青親率官兵鄉勇迎捕截殺斬獲甚多賊匪敗退續  
調官兵未到以前尚能如此連得勝仗現在大兵雲

集軍威壯盛常青統領廓清後路無難將竄聚賊黨盡  
數殲除是此時南路情形儘可無慮惟北路鹿仔港  
一帶前據常青奏稱避賊難民俱在該處恐賊人乘  
虛竊發欲留任承恩在彼帶罪督兵今既將任承恩  
遵旨送回內地則該處止有柴大紀普吉保二人恐  
兵勢單薄難以支持且兵民人等見提督解任送回  
內地未免心生疑懼而鹿仔港距大里找賊巢最近  
深慮賊匪聞而生心乘虛竊發著傳諭藍元枚速赴

鹿仔港會同柴大紀普吉保整頓兵力遙為聲援牽  
綴賊勢藍元枚未到以前北路係專交柴大紀普吉  
保二人在彼辦理柴大紀普吉保皆係總兵大員雖  
調度籌畫非其所長而臨陣打仗情形亦應隨時奏  
報何二人近來無一摺奏耶况前據常青奏柴大紀  
駐劄諸羅屢有勝仗賊匪既至諸羅滋擾柴大紀與  
之打仗普吉保駐劄鹿仔港與大里找賊巢尤近自  
亦必有賊匪來擾斷無互相坐視之理何以俱未據

該鎮等奏及著再傳諭柴大紀普吉保將現在北路堵剿及賊匪曾否在鹿仔港滋擾暨官兵有無剿殺打仗情形各行迅速據實奏聞

十六日

壬午

常青奏言四月十九日將郝壯猷押赴

軍前正法在軍將弁無不懾懼并飛劄柴大紀普吉保令其戴罪圖功奮勉出力以郝壯猷為前鑒至鳳山退回之兵其初止存四百餘名現奉

恩旨貸其一死盡皆感戴輸誠願効死力其餘尚有未



回官兵是否陣亡抑係潰散躲避容即逐一確查辦理從此軍令益明士氣倍奮現在南北賊匪稍知歛跡但察看各路鎮將遇賊侵犯尚能殺獲取勝而俱未能掃穴擒渠固由從前彼此觀望亦由道路未通勢分力薄茲福州將軍恒瑞提督藍元枚親身領兵前來臺灣會合進剿俱各授為叅贊大臣正可與之悉心籌畫惟立定主見不以零星打仗致稽時日惟俟粵省兵四千名及駐防滿兵一千名不日到齊後

即親自統領厚集聲勢嚴整紀律一鼓作氣從南路  
以至中路北路務期乘勝長驅尅期歲事再查遊擊  
鄭嵩在鳳山殺賊陣亡此外尚有遊擊延山在南門  
山埔禦敵被賊圍害原任同知王雋在鳳山之石佛  
頭地方罵賊被害理合附奏至總兵普吉保自調赴  
北路後在八卦山打仗尚知出力柴大紀保守諸羅  
屢據該鎮稟報賊衆來攻該鎮親督將弁帶領兵丁  
義民將賊殺退臣覆查無異是柴大紀普吉保尚無

畏蕙情事副將徐鼎士前抵淡水經任承恩調赴鹿仔港以艋舺民人懇留未行查淡水地方遼廓亦有賊匪嘯聚現無文武大員在彼則該處民人請留彈壓尚係實情臣到臺灣後節經札查茲于四月十九日副將徐鼎士遊擊吳秀等稟報三月初二二十一等日在淡水屬之三貂金包裹等處與遊擊易連護叅將羅禮璋等帶領官兵義民剿殺賊匪俱各得有勝仗等情自是由淡水至臺灣府城南

路梗塞所以稟報稽遲但淡水距府既遠所報打仗殺賊尚須確查如有捏飾定按軍法懲治再調赴臺灣之粵兵四千名總兵陸廷柱所帶之二千五百名已到派往鹿仔港之一千五百名檄令全赴鹿耳門現已陸續改赴已到一千三百餘名其一百餘名以及總兵梁朝桂俱計日可到臣現於舊存及散回各兵內挑其壯健可用者間入新兵令勇往之將弁各帶領數百名于附近府城賊匪

往來之處先行逐一搜捕除俟添調內地官兵到後立即起程進剿

同日柴大紀奏言自本年正月二十二日克復諸羅賊匪四散竄匿當將城內安撫隨剿營北門外田洋就附近村庄遍處搜捕至二月初八日有奸匪張慎徽假充義民先將與逆首林奕文不和之偽先鋒吳聰擒交武舉黃奠邦解獻以為憑信是日帶匪夥三十八名前來求在軍前効力希圖內

應臣見其形跡可疑令張慎徽一人進見餘人俱住營外詢其言語枝梧隨密飭將備將匪夥盡行擒獲臣將張慎徽擒拏研訊據供實係謀為內應隨將該犯等盡押教場梟首示衆當差把總李春魁帶兵並縣役林秀等往該犯家中拏獲該犯之母吳氏妻董氏子張振傳女隨娘併幼子一口搜出林典文約單一紙內開速撥勇夥一千名候齊攻取諸羅字樣隨將該犯家屬人等發交署諸羅

縣收禁又十二日探得賊匪聚集二千餘人離諸羅  
縣城二十里之大坪頂隨飭遊擊楊起麟林光玉守  
備陳明德邱能成帶兵八百名又武舉陳宗器黃  
奠邦帶領義民臣帶兵二百名隨後接應于十二  
夜五更起行黎明齊赴大坪頂圍拏殺斃賊匪多  
名生擒蔡慶翁月等七犯又義民縣役獲賊黃專  
等共十七名除蔡慶一名傷重旋即身死其翁月  
等十六名審明隨賊打仗燒庄即行正法又二十

五夜二十六日賊匪蔡福約會南路賊匪陳靈光  
兩路夾攻諸羅蔡福賊衆先來攻北門營盤臣督  
率官兵義民奮勇力戰自亥至卯賊被鎗砲打死  
者數百殺獲首級三十餘顆生獲賊匪張淡等二  
十三名搶獲行營砲一門百子砲二門餘匪遠逃  
正在追趕間適南路賊匪陳靈光等數千人來攻  
東南門營盤隨即將兵收回與遊擊李隆林光玉  
合兵一處協力剿殺自未至酉賊匪被鎗砲打死



者百餘人餘賊四散奔逃生獲賊匪林洗謝蒲許  
進三名因近黑夜不敢遠追其許進被鎗傷重解  
至軍營身斃梟首示衆兩處獲賊張淡林洗等共  
二十五名其張淡林洗黃潤胡炎張力吳道王沈  
周春楊輔王玉周文謝蒲等十二犯解送提臣究  
辦其黃光興陳洪盧力盧罕李圭林硯陳光弼等  
七犯因受傷重越日身死戮屍又三月初二日探  
賊目李阿七併南路賊目陳靈光等率衆數千人

聚集牛稠山北勢庄

臣

酌留遊擊林光玉仍守營

盤督率遊擊楊起麟李隆守備邱能成等帶領兵

丁義民前往剿拏鎗砲打死賊匪數百名殺死者

亦多內殺死騎馬賊一名搜出偽輔國帥印一顆

餘匪四散奔逃生獲賊匪張炎等十七犯審明正

法其偽印暫存另解再三月初八日南路鳳山縣

復被賊陷逆首林奕文復肆鴟張于三月二十九

日糾衆數萬分路復攻諸羅

臣

飛飭駐劄東門外

遊擊林光玉駐劄南門外遊擊李隆實力防禦又  
派署把總蔡開祥孫朝亮帶領鎗砲兵丁赴西門  
外要路截拏臣親督遊擊揚起麟守備陳明德揚  
勵邱能成等仍在北門外田洋堵禦賊衆將近營  
盤臣率將弁兵丁向前抵禦連放大砲轟擊自外  
至未打死賊匪甚多賊衆奔逃隨率將備兵丁義  
民乘勢追過兩條溪至火燒庄地方因日暮收軍  
奪獲百子砲一門火藥一桶布帳房一架斬獲賊

首八十六顆生獲賊匪蔡瑞等一十名又諸羅縣  
役生獲賊匪蕭光明一名審明正法再四月初四  
日逆匪林奕文等糾衆數萬分作三路來攻東北  
西三門營盤臣督率將弁兵丁齊放鎗砲自卯至  
午打裂大砲二門賊匪雖被鎗砲打死數百名尚冒  
死前來臣親率揚起麟邱能成飭將大砲往前上  
緊連轟官兵並各義民及壯番一齊奮勇冲殺賊  
始敗退追至白石庄賊被鎗砲打死者數百賊匪

奔逃又南門外草店尾賊匪數千來攻即收兵帶  
赴南門督率官兵義民向前力戰打死賊匪百餘  
名賊匪逃遁追至火燒庄因天晚收軍番民阿里  
稍被傷吧咆陣亡奪獲砲一門器械等項斬獲賊  
首三十餘顆生獲賊匪陳全陳立呂憲等三名審  
明正法再安平右營兵丁陳恩成私往雲霄盾強  
取民人張陳氏衣服挈解研訊屬實隨將衣服追  
出給還張陳氏領去即將該兵丁正法示衆併將管

東不嚴之署把總黃春陽細責示儆又四月初十日  
卯刻賊匪萬餘人分作三路來攻東西北三處營  
盤臣督令各營官兵義民抵敵自卯至未我兵連  
放大砲數十門打死賊匪數百名賊尚恃衆不退  
臣率遊擊楊起麟守備邱能成等併武舉陳宗器  
黃奠邦監生徐宜玉貢生楊振魁武生王得祿等  
各義民壯番一齊向前力殺連放大砲打死騎白  
馬賊一名騎紅馬賊一名餘賊被砲打死甚多賊

衆向北飛逃臣分兵三路直前追殺殺死賊匪數

十名追至牛欄山後賊匪四散逃竄將賊匪所搭

草寮盡行焚燒因營盤空虛未便遽追隨即收軍

查鎮標外委劉欽兵丁程忠吳森三名遇賊懼怯

不放鎗砲即行逃回以致賊冲入隊兵丁鄭得洪

林義傳起龍張應選李日全等五名被賊殺死當

經遊擊楊起麟把總陳洪猷等奮勇殺賊隊伍得

以不亂似此臨陣退縮之弁兵若不速正典刑無

以敝戒將來隨將劉欽程忠吳森等三名在軍前  
正法將首級遍遊各營示衆奪獲大小旗十五桿  
鉛子一簍帳房二架牛皮牌竹牌半斬刀等項斬  
獲賊首五十八顆生獲賊匪蕭全劉科郭元林清  
元等四名審明正法十二日寅刻賊衆萬餘復來  
攻西北二處營盤先放鎗砲臣督令將備官兵義  
民與賊對放鎗砲自寅至午賊被大砲打死百餘  
名我兵奮勇前進又打死騎馬賊二名內一名身



邊搜出偽單一紙寫股頭陳葛名字賊隨退怯臣  
督率將弁官兵義民向前追殺至火燒庄地方賊  
匪四散飛奔又據報南邊賊匪數千來攻南門臣  
見北路賊衆逃去已速隨將兵收回趕赴南門督  
令奮勇力戰齊放鎗砲賊被大砲轟死甚多督飭  
遊擊李隆等帶領兵丁義民前往追趕至八獎溪  
賊匪遁遠日暮收軍奪獲馬蹄砲一門鉛子一包  
牛皮牌竹牌長鎗等項斬獲賊首四十八顆生獲

賊匪陳諧洪乾郭苞劉淺李俊黃魯呂送李報又  
縣後等獲簡宗一名共九名審明正法伏思諸羅  
地居臺灣之中為南北要區逆匪林爽文復糾南  
路賊目陳靈光等日來侵犯雖經臣疊次殺敗乃  
匪徒尚多諸羅陸續收到潰回兵丁五百餘名俱  
無器械惟就地設法製辦長鎗配用臣所帶之兵  
共止一千九百餘名若統帶北剿誠恐縣城難守  
如酌留守城則臣之兵亦覺單薄難以剿捕現已

呈請督臣常青撥兵來守諸羅縣城隨即督兵長  
驅直前會合總兵普吉保併剿賊巢擒獲渠惡以  
期迅速歲事又臺灣額兵併外委額外共一萬二  
千一百六十八名內北路協中左右上淡水等四  
營額兵共三千零二十二名當逆匪滋擾之時該四  
營兵丁自守不敷南路營下淡水營兩營額兵共  
一千五百一十四名北路既被賊擾南路亟宜防  
備惟有飭該兩營嚴加守禦所有兵丁難以抽調

鎮標中左右三營額兵共二千五百四十五名內  
先經調撥鎮標中營遊擊耿世文等帶兵三百名  
赴彰化查緝續又撥鎮標左營遊擊李中揚千總  
蘇明耀魏大鵬等共帶兵六百名往諸羅接濟又  
臣帶本標兵三百名在鹽埕橋堵禦外尚有兵一  
千三百四十五名臣前奏調度水陸官兵四面守  
禦俱係離城稍遠之各總要處所劄營而城內地  
方遼濶亦不得不再加防範城守兩軍額兵共九

百三十二名內派撥左右兩軍守備帶兵五百名  
駐劄小東門外舊萬壽亭尚有兵四百三十二名  
不敷分守東西南北大小八門且府城週圍所安  
水柵原屬稀疎每根俱離數寸處處可以偷鑽當  
與臺灣道永福相商飭署中營遊擊守備王天植  
會同左右營將弁將鎮標三營所存兵丁一千三  
百四十五名除管理火藥軍裝外俱令添防各城  
門併于城內挨靠木柵節節安兵晝夜嚴守臺協

水師三營額兵共二千二百九十七名內遊擊楊起麟林光玉共帶兵七百名跟隨臣在鹽埕橋營盤又遊擊鄭嵩帶兵一百名在郡城巡查彈壓外尚有兵一千四百九十七名分防鹿耳門併北路鹿仔港南路打狗東港等處各洋面口岸均關緊要澎湖協兩營額兵共一千八百五十八名內調遊擊蔡攀龍帶兵七百名來臺灣駐劄南門外桶盤幾餘兵仍守澎湖上年十二月臣在鹽埕橋禦

賊實僅有兵一千餘名此實在情形也當時急忙未將臺灣原設兵額一萬餘名奏明現作何用實屬糊塗咎無可辭茲蒙總督臣常青轉飭理合明白具奏均奏入

上命軍機大臣傳諭常青李侍堯藍元枚柴大紀曰柴大紀駐守諸羅在大里找賊巢之南普吉保駐守鹿仔港在大里找賊巢之北若柴大紀一俟添兵到彼即率領進剿直搗賊巢設賊匪一面負隅死守一面

分佈黨羽從山僻小路繞出官兵之後復滋擾諸  
羅則柴大紀前後受敵退無所歸兵心未免惶惑于  
事大有關係不可不慮前經有旨諭令藍元枚一到  
鹿仔港祇須會同柴大紀普吉保整頓兵力作為進  
攻大里找以牽綴賊勢無庸急于進兵想常青亦見  
及此矣此時柴大紀即有常青續撥官兵來到諸羅  
仍應固守該處或會同普吉保先將南北通衢斗六  
門大武隴等處之佔踞賊匪剿除廓清總俟常青統



領大兵到時合力直搗賊巢無難一舉集事不可冒  
昧輕進置諸羅于不顧行軍之道有欲速而反遲似  
緩而轉急者該鎮不可不審度機宜權衡悉當也現  
在審訊賊夥林家齊有賊首林奕文事勢窮蹙欲逃  
往內山生番不愛銀兩只愛花紅布疋之語雖係賊  
匪混供不足憑信但賊匪將來勢窮力極明知一經  
官兵擒獲萬無生理或竄入內山勾結生番希圖苟  
延殘喘亦事理所有不可不預行籌辦生番伏處內

山性同禽獸未必通曉理義但利害或知所趨避常  
青即可先趨此時懸立賞格令其縛獻首夥各犯即  
給以花紅布疋生番貪圖貨利自必踴躍樂從並廣  
行出示開誠曉諭該生番以賊匪數千人竄入爾境  
必將佔踞爾之地界侵奪爾之牲畜日久受其擾累  
若能擒獲獻出既可受恩賞花紅布疋又可免賊  
人侵害如此令明白通事愷切宣諭生番自為生計  
貪圖利便自不致容留藏匿常青仍應揀派奮勇能

事將領帶兵于通內地各要隘處所嚴密防堵將來  
進兵時四路截拏更可一鼓殲擒搜捕淨盡不留餘  
孽至鳳山潰回兵丁常青處前後有一千一百餘名  
柴大紀處又稱有潰回兵五百餘名想來自係在鳳  
山敗逃之數如果該兵丁等逃後仍敢去而從賊查  
獲自當即行駢誅今竟尚知大義不敢從賊仍自行  
投到隨同官兵打仗出力尚有一綫可原自可貸以  
一死令其戴罪圖功至副將徐鼎士所稟被百姓留

于臚卹剿捕賊匪之處是否確實統俟事竣之後查  
明如有捏飾再行叅處尚可從緩非此時之急務也  
再崇大紀摺內稱所獲賊匪張淡等犯解送提督黃  
仕簡究辦黃仕簡曾否審訊明確作何辦理並著常  
青查明據實覆奏

上又諭內閣曰崇大紀駐守諸羅兩月有餘賊匪屢次  
滋擾連得勝仗斬獲甚多並能識破內應奸匪擒拏  
正法崇大紀前此保衛郡城及此次駐守諸羅堵禦

賊匪始終奮勉出力朕心深為嘉獎並將私往村庄  
強取民人衣物之兵丁陳恩成審明正法衣物給還  
原主所辦尤為得當柴大紀著交部議叙並賞大小  
荷包仍賞常青恒瑞奶餅各一匣藍元杖柴大紀普  
吉保奶餅共一匣著各查明打仗出力將備官員分  
散賞給俾得均沾恩賚以示鼓勵至常青所奏遊擊  
鄭嵩延山在鳳山殺賊陣亡又委解兵餉之原任同  
知王雋一員罵賊被害俱屬可憫鄭嵩延山王雋均

著交部照例賜卹又柴大紀連次打仗所有陣亡受傷弁兵俱著該部查明照例賞卹至鄉勇義民隨同官兵晝夜防範奮勇殺賊實屬可嘉其陣亡受傷者俱著遵奉前旨照兵丁之例加倍卹賞以示鼓勵又番民吧咆被賊砲打死阿里稍被砲受傷較之鄉勇義民更當優賞著常青分別妥為賞卹其隨同柴大紀打仗出力之武舉陳宗器黃奠邦亦著常青酌量獎賞具奏



欽定平定臺灣紀畧卷十七



欽定四庫全書

欽定平定臺灣紀畧卷十八

五月十七日

癸未琅玕奏言前准李侍堯札會奏撥

浙省米石業於杭州等府屬酌撥倉穀碾米十萬石運赴閩省茲又採買米六萬石俟小暑節後風順派員分起押送由乍浦赴廈門泉州二處交收  
奏入

上命軍機大臣傳諭李侍堯琅玕曰前因閩省內地及

臺灣支給口糧撫卹難民均須米石應用是以諭令琅玕於撥運米十萬石外再行察看情形寬為籌備今該撫又於杭嘉二府地方採買米六萬石派員陸續運閩是浙省所辦米石不為不多現在臺灣勦捕逆匪已可將次歲事且尚有江西採辦之米運往接濟儘足敷用況閩省本年麥收豐稔內地民人自不虞乏食著李侍堯務須撙節辦理不可恃隣省協助無虞匱乏致有糜費

上又命軍機大臣傳諭常青李侍堯曰昨據福建委員將林家齊一犯解到當令軍機大臣審訊據供林爽文作事仗族弟林泮主謀並有軍師陳奉先及董姓等若不能得勝即逃往內山投奔生番處藏匿又大里杙後二十餘里就是生番地方該犯與林爽文等家口仍在阿必羅庄居住林爽文怕官兵查拏派人把守等語現在常青自己統領大兵廓清後路直搗賊巢與藍元枚等會合夾攻但林家齊供有林爽文

預商逃往生番之語大里杙距生番地方止二十餘里易於竄入不可不嚴行防堵常青統兵到彼務須將大里杙莊四面圍繞嚴密搜捕毋使逆犯得以乘間竄匿又須向生番處查拏不致要犯漏網常青務即遵奉昨降諭旨令明白通事曉諭生番如林爽文等逃入內山即生擒獻出必當獎賞花紅布疋使生番貪利樂從不致收留藏匿此為最要其林爽文林家齊等家屬將來皆應緣坐必須按名搜捕今據林

家齊供出皆在阿必羅庄居住常青亦務須逐一搜  
捕查拏盡淨不可稍留遺孽至林爽文之謀主林泮  
陳奉先及董姓俱係緊要逆犯擒獲後必須派員解  
京盡法懲治以彰國法

上又諭內閣曰武職大員如或心存私見於所屬弁兵  
有需索不遂及挾嫌專戮情事不但當革職治罪即  
予以抵償亦所應得若行軍之際紀律專在嚴明綠  
營惡習最為可惡平時則強取民物臨陣則懼怯退

回此而不誅其何以昭軍令而肅戎行柴大紀將臨陣退縮之弁兵立正典刑並將私取民物之兵丁亦按軍法從事是以將弁兵丁共知儆懼而郝壯猷駐守鳳山不惟不能策勵士卒抵禦賊匪且畏怯倖生從而逃回是以身伏刑誅朕於軍務從來信賞必罰其奮勇出力者必從優甄錄而畏葸退縮者亦必重治示懲國家累洽重熙兵可百年不用不可一日無備前於甘省勦捕逆回藏事後曾命軍機大臣會同

該部將行軍紀律擇其緊要數條頒發各營操演講習乃尚有郝壯猷等之畏蕙偷生者著將柴大紀用法嚴明得邀獎叙郝壯猷怯懦逃回按律正法之處補行載入通行訓諭各營伍俾專聞大員曉然於敵愾大義共矢蓋忱而將脩兵丁人人有勇知方恪遵軍紀盡成勁旅以副朕整飭戎行諄切告誡之至意臣等謹案行軍之道全在紀律嚴明斯弁兵等整肅用命我

皇上特命將嚴整之員邀叙怯懦之員重懲補載入行軍紀律昭示營伍信賞必罰所以策勵之方無微不至故弁兵等感惕奮興戰無不捷也

二十日

丙戌

李侍堯奏言恒瑞所帶滿兵一千於四

月二十九日全抵厦門登舟浙兵即隨滿兵之後由蚶江配渡之二千名於本月初七日已經全到提臣藍元枚已於初六日赴蚶江帶兵配渡尚餘浙兵一千昨准將軍常青札稱南路賊匪甚多是



以臣亦令由廈門前往臺灣府城計初八日可至  
廈門登舟總兵梁朝桂已先在廈門待渡一得順  
風兩路官兵俱可速到至臺灣近日情形臣叅核  
各官所稟自四月初十日賊匪莊大田等攻撲府  
城被官兵殺退之後十五日草店尾三坎店兩處  
又有與賊打仗之事莊大田又率衆至府城外  
十五里之南潭庄窺伺欲待天雨官兵難施鎗砲  
即來攻城適粵兵四千已到常青正欲先勦南潭

而二十五日賊又來攻小東門及草店尾桶盤棧等處被官兵殺退此府城四月二十五日以前情形也諸羅一帶三月二十九日賊首林爽文率衆來攻總兵柴大紀親率弁兵衝出直追殺至火燒庄地方因日暮兵單始回四月初十二十八等日林爽文又來攻擾俱被殺退常青又於十六日令衆將潘韜前往助剿潘韜因陸路賊多不能前進回至府城由海路前往於二十日到諸羅其鹿

仔港一路自三月二十以後林爽文留賊目陳泮  
林慶守大里杙虎仔坑等巢自率羣賊南攻諸羅  
是以鹿仔港稍得寧息近日常青因柴大紀報稱  
林爽文尚團聚於大埔林斗六門等處飭令普吉  
保與柴大紀夾攻普吉保即於四月二十六日帶  
兵前往今藍元枚又帶浙兵赴鹿仔港接濟正覺  
事機相及再查該道府所稟府城一處但請支給  
鄉勇僱價未有撫卹難民之條鹿仔港一路則請

難民照災賑之例支給口糧并聲明本折兼支令其兼買番薯湊食其鄉勇則請照出征兵丁每日給米八合三勺鹽菜錢十文另加給錢三十文挑選壯丁以脩征戰是府城只應解銀鹿仔港應銀米兼解但米石一項臣到任後當即派閩省各州縣碾運米十五萬餘石合之原派四萬五千石共成二十萬石之數繼又因臺米到少恐將來有需平糶等事復奏請撥運浙省米十餘萬石在案因

閩省各州縣運米有山溪之阻是以所派二十萬石雖屢次嚴催到泉廈者僅十二萬餘石餘俱未到而所撥浙米由海道解運亦非一時所能猝到現在泉廈兩倉僅存米五萬石自宜留備兵糧今府城與鹿仔港各解銀十萬兩前往查該道府等所請銀十萬兩原非專為府城鄉勇另有夫價等項亦在其內得此銀兩一切俱覺寬裕而鹿仔港難民臣前已米薯兼辦茲復有銀十萬兩以作賑

卹之資及鄉勇僱價俱聽其或米或薯自行買食  
則鄉勇難民均可贍濟其泉厦兩倉現貯及將來  
續到各州縣所解並浙省運來之米俱留備兵糧  
及地方平糶如此則臺地鄉勇難民可不至乏食  
而接濟軍糈民食亦俱不至缺少

同日藍元枚奏言臣於五月初五日到泉州浙兵  
亦於是日抵泉初六日到蚶江配船臣亦即配船  
候風放洋均奏入

上命軍機大臣傳諭常青李侍堯藍元枚曰臺灣近日情形業據該總兵將打仗殺賊之處奏報已明降諭旨將柴大紀交部議叙至四月二十五等日賊匪復攻府城經常青率領官兵堵禦勦殺情形尚未據該將軍奏到彼時臺灣新調官兵尚未到齊常青等督率將弁尚能將窺伺賊匪奮勇殺退此時各路官兵全數到彼聲勢更為壯盛常青等統領進勦必當勢如破竹其鹿仔港一路據李侍堯奏賊首林爽文率

羣賊南攻諸羅該處稍得寧息現在藍元枚於本月初五日帶浙兵二千名在蚶江配渡該提督揚帆直達該處聲勢益覺聯絡自可會同柴大紀普吉保將大埔林斗六門等處賊匪先行殲戮俾南北道路廓清至常青派令潘韜帶兵一千名前往諸羅助勦該叅將因陸路賊多兵少由海道繞至諸羅尚無不是與其輕率前進致有挫失自不若繞道行走雖到彼稍遲而添兵協勦更為得力也至李侍堯奏撥解銀



米前赴臺灣一摺自應如此辦理此項銀米若該道府等果有冒濫將來事竣後李侍堯自能嚴行查核據實叅處此時惟當照彼所請如數給與若過於靳惜則承辦之地方官有所藉口而難民口食無資勢必去而從賊豈非藉寇兵而資賊勢耶又現在臺灣戍守兵丁經常青等帶領追剿正當得用之時若應輪屆換班遽行撤回轉將未歷行陣之兵派往更替於事實屬無益自應俟事竣後再行照例辦理

二十三日已丑李侍堯徐嗣曾同奏言閩省內地米

穀近因臺灣商販稀少漳泉府屬市價稍增經臣

李侍堯於浙省籌撥米十萬石並酌籌平糶茲復

仰蒙

聖諭必須多為籌畫有備無患現准浙江撫臣琅玕咨  
稱該省可以及時採買臣等一面咨會浙省妥為  
籌備約以十萬石為率一面委員前往會同該處  
地方官妥協辦理由海道陸續運回所需米價應

請即向浙省動支發值既免解運之煩復省水脚  
之費更覺便益至閩省籌辦米石固多多益善而  
浙省春收雖稔秋成尚遠誠恐販運過多致該處  
市價增昂亦不可不為慮及現在臺灣軍威壯盛  
可期尅日蔽功臣等飭令該委員到浙省後不拘  
買運多寡一得此地捷音即停止採買庶於浙省  
糧價不致有妨而閩省民食亦足資接濟奏入報

聞

二十四日

庚寅

常青奏言粵省官兵惟總兵梁朝桂

路遠未到此外鎮將弁兵俱已先後到齊兵數較前已增乃賊匪醜類衆多自府城十里之外如虎尾寮嵌頂埔布袋尾崙仔頂大穆降等庄先已被賊盤踞到處焚劫雖經派撥將弁帶兵搜捕猶敢恃衆抗拒於四月二十五日辰刻南路之賊約有萬餘圍攻城外東南北三處營盤其小南門外之桶盤棧營盤有賊四五千來攻臣在小南門城

樓指示調遣分撥副將官福遊擊蔡攀龍率領弁  
兵鎗砲齊發戰至午刻賊人敗退其大南小東大  
北各門俱有賊千餘人俱被鎗砲打回共計是日  
鎗砲打死賊匪四百餘人奪獲賊械三十餘件又  
於二十九日卯刻賊復糾衆來攻城外三營盤臣  
仍照前在小南門城樓指示分撥堵殺將弁兵民  
奮勇夾擊至巳刻賊衆敗退是日鎗砲打死賊約  
計四五百人奪獲鎗砲刀牌等項官兵義民傷亡

者俱一併記功賞卹註冊臣查賊人初起為數有限故大兵未到之前賊來犯郡義民鄉勇尚能保護乃數月以來賊人黨羽日積日多蔓延肆擾臣察看現今府城八門週圍堆卡並城外三處營盤勢必留兵防禦原調現存及挑出鳳山潰回各兵內除撥給柴大紀一千一百餘名外酌留分派駐守只有粵兵四千名於進剿事宜尚覺不敷應用計算恒瑞所帶之兵旬日之內即可到臺灣臣一

俟滿兵一千名到時即同恒瑞起兵前赴南路跟  
踪搜勦督臣李侍堯奏撥浙江兵一千名隨到即  
趕赴軍營則兵力益厚軍威愈壯南路之賊定可  
迅速殲除至滿兵未到之先仍派奮勇將弁酌帶  
兵二千餘名在府城附近搜捕賊夥再諸羅屢有  
賊擾亦被柴大紀督率官兵殺退但諸羅彰化淡  
水等處因道路未通兵分力薄故柴大紀普吉保  
等尚未能進搗賊巢直擒首惡臣將南路掃除淨

盡即乘勢星赴諸羅一帶併力合攻自可一舉蕝事  
同日柴大紀奏言四月十六日寅刻賊匪萬餘分  
作兩路來攻諸羅城東北二門營盤臣飭令官兵  
義民堵禦自寅至巳賊尚不退隨將大砲聯絡轟  
擊打死執紅旗騎馬賊一人及賊匪數十名賊始  
披靡臣復親率遊擊楊起麟守脩邱能成陳明德  
楊勳把總蔡開祥署諸羅縣陳良翼并武舉陳宗  
器黃奠邦等各官兵義民奮勇追殺守脩邱能成



望見騎紅馬賊認為林興文急欲生擒帶兵衝入賊隊兵丁邱文俊胡得長放鎗打倒賊馬賊即墜地把總蔡開祥羅勇趕上認非林興文隨將賊砍死餘匪被鎗砲打死者約有七八十名賊衆潰逃官兵隨至牛稠溪邊賊衆先將上流溪水築住官兵追至時賊衆已將上流溪水盡發官兵不能過隨收兵回營其衝入賊隊內之右營兵丁沈朝佐周振綱等十名義民蔡羣一名俱被賊殺死生獲

賊陳候林允二名殺獲賊首四十二顆奪獲馬匹  
旗號弓箭藥鉛竹牌等項將獲匪二名審明正法  
十八日黎明北邊賊匪數千蜂擁前來臣督弁兵  
奮勇迎敵與賊對放鎗砲自卯至未賊匪被大砲  
打死者百餘人賊稍退去正在率軍往追見東邊  
有賊匪千餘突出西邊亦有賊匪數百隨飛飭遊  
擊林光玉李隆併各義民一齊出戰賊匪被鎗砲  
打死併殺死者甚多至申刻三處賊匪俱皆奔竄

追過牛稠溪日暮收軍殺獲賊首三十一顆奪獲  
子砲二門火藥一桶綿被二條大小旗杆竹牌半  
斬刀等項惟是首惡林興文糾衆復來侵犯臣臨  
陣未能即獲不勝忿恨現經查探該犯實在潛居  
何處一得確信自當竭力擒拏並飛移總兵普吉  
保速即撥兵會拏奏入

上命軍機大臣傳諭常青李侍堯藍元枚柴大紀曰看  
來南路賊匪蜂屯蟻聚勢尚蔓延常青發摺時只

有粵兵四千名於進剿事宜似不敷用計此時恒瑞所帶滿兵一千名及李侍堯奏撥浙江兵一千名早抵臺灣兵力益厚軍威愈壯常青恒瑞親督率前赴南路跟踪收剿廓清後路並揀派得力將脩於賊匪出沒各要隘駐兵守禦防其繞出來犯鳳山郡城之路最為緊要至賊匪日積日多蔓延滋擾皆無藉貧民迫脅從賊一將林爽文擒獲自必紛紛潰散所謂聚易散亦易也至鄉勇義民隨同官兵晝夜防範奮勇

殺賊實屬可嘉其陣亡受傷者前經降旨照兵丁之例加倍卹賞本日柴大紀摺內有武舉陳宗器黃奠邦等率領義民奮勇殺賊此等武舉義民非弁兵可比能打仗出力更應格外優獎著即查明將陳宗器等拔補千總等官以示鼓勵其有奮勇出衆者即超擢守備亦無不可並著常青一體查明義民向有實在出力者必須迅速嘉獎破格拔擢庶伊等共知獎勵用命爭先於剿捕更為得力其署諸羅縣知縣陳

良翼堵禦賊匪甚屬奮勉即著實授柴大紀普吉保  
果能將賊首林興文生擒解京其功甚大必邀不次  
之賞但該總兵等若自審兵力尚單不能率兵果入  
搗穴擒渠亦應持重不可冒昧輕進究應俟常青統  
領大兵到時會合夾攻為是其逆犯王芬首級既據  
常青查究明確所有砍殺王芬之義民鄭岱等俱應  
酌量獎賞

同日李世傑奏言請於蘇州松江等屬常平倉貯

項下動撥穀二十萬石碾米十萬石由松太一帶海道運閩省泉州聽候撥用以濟軍需奏入

上命軍機大臣傳諭李侍堯李世傑閩鄂元曰昨據李侍堯等奏委員前往浙省購辦米石不拘多寡一得捷音即令停止採買是浙省續辦之米尚可脩而不用又何須江省動撥倉穀碾米運閩惟是閩省糧米向藉臺灣接濟今臺灣賊匪滋擾小民耕種失時不但該處所產之米不能運至內地且漳泉等屬因商

販稀少市價稍有加增兼以臺灣支給口糧撫卹難民等事需用浩繁轉須由內地運往此時或不妨寬為籌備俾民食兵糈益資充裕現在江省倉穀業經李世傑等動撥出礮且毋庸配渡起運著李侍堯察看情形如兵糧民食足敷應用不須隣省協濟即咨會李世傑等停止起運倘閩省糧米尚有未敷必須廣為儲備亦即一面咨會李世傑等令其委員押運一面奏聞



二十六日

壬辰


上命軍機大臣傳諭常青李侍堯藍元枚柴大紀普吉  
保曰現今軍機大臣審訊林小文供林興文所居之  
大里杙莊縱橫皆約有五里可容萬餘人此內林姓  
聚族而居共有三千餘丁莊內以大毛竹為牆垣牆  
外有溪水環繞等語將來擒獲首犯剿滅賊巢後所  
有林姓各犯三千餘人俱係黨惡附逆必須搜捕淨  
盡不可使一名漏網但據供大里杙莊以毛竹為牆

垣週圍又有溪水環繞且賊匪盤踞已久其防守自必周密常青到彼時務須四面圍繞設法攻砍此等毛竹圍牆當以火攻為上策所有應用火藥不可不多為預備設有不敷即當由內地調取至籌備軍械火藥等項源源接濟著交李侍堯專辦倘有短絀惟該督是問至林興文屢次攻擾諸羅似因柴大紀任臺灣總兵日久稍有威望是以專力侵犯使柴大紀不能抵禦為其所圖則此外諸人更可不以為意得

以肆行無忌柴大紀能悉力堵禦奮勇殺退甚屬可  
嘉常青令叅將潘韜帶兵一千餘名前往協剿助其  
聲勢甚合竅要但普吉保駐劄鹿仔港距諸羅甚近  
自亦必有賊匪來擾斷無坐守之理何以未據該鎮  
奏及著普吉保即將近日鹿仔港有無賊匪滋擾及  
堵禦截殺情形據實速奏藍元枚帶領浙兵前抵鹿  
仔港固不可冒昧向大里杙賊巢進攻但諸羅彰化  
斗六門大武壠等處南北通衢皆為賊人佔踞藍元

枚至彼當會合普吉保整頓兵力先至諸羅幫全柴  
大紀設法殲擒以便常青將南路賊匪除淨直由中  
路北路進抵大里杙不致中途少有阻撓方為上策  
至本日解到四犯皆係義民擒獲又解到賊匪蔡綱  
供稱跟隨賴樹打仗夥黨共五六百人後遇義民四  
五千前來攻剿即被殺散拏獲等語是鄉勇義民不  
僅奮勉可嘉而且較之官兵數多著常青即行查明  
加意獎勵破格賞擢俾伊等益知激勸於剿捕更為

有益



欽定平定臺灣紀畧卷十八

欽定四庫全書

史部

欽定平定臺灣紀畧卷

十九至二十一

內閣中書

臣

沈鵬覆勘

武英殿纂修中書

臣

彭元琬

欽定四庫全書

欽定平定臺灣紀畧卷十九

五月二十七日

癸巳

柴大紀奏言四月二十一日探

得南路賊匪千餘潛聚於離縣十餘里之柴頭港

草麻莊兩處欲截鹽水港往來之路使文報不通

軍需難運臣查兩處地方相近隨即帶領署遊擊

邱能成守脩揚鵬武舉陳宗器併義民等馳赴柴

頭港飭遊擊林光玉守脩黃象新武舉黃奠邦併



義民等馳赴草蓆莊兩處一齊圍拏砲打死賊匪  
各數十人賊俱向西北奔逃追至水牛厝地方烏鎗  
打死賊匪數十人趕過八掌溪尾賊衆四散遠竄  
該處竹圍錯雜又多溪坑恐有埋伏收軍惟兵丁  
陳連熟番海山二名陣亡義民黃奇許杏蔡平三  
名受傷奪獲賊旗砲子等項生獲賊匪李興一名  
審明正法又探得林奕文糾衆復蟻聚於離縣十  
餘里之打猫東勢湖等處妄圖截路以禁薪炭入

城臣於二十三日黎明親統官兵往拏正起行間賊匪數千分路來犯東北營盤隨排列隊伍對敵又據遊擊李隆報稱南路賊匪千餘來攻南門營盤即飛飭守備黃象新將所帶兵丁併武舉黃奠邦監生李百川武生鍾習信等各義民隨遊擊李隆協力剿擊臣督率遊擊楊起麟林光玉邱能成守備楊彰陳明德署諸羅縣陳良翼武舉陳宗器貢生張明義生貢吳正蘭監生徐宜玉等各義民

在東北一帶截殺連放火砲賊亦對放鎗砲自郊  
至午賊被火砲打死約有百餘名尚抵拒不退臣  
見東邊賊勢散漫鎗砲亦少即飭遊擊林光玉守  
脩楊鵬等冲去剿殺其正北一帶賊匪稠密鎗砲  
且多料林爽文或在其中隨飛馬直冲遊擊楊起  
麟邱能成等併各義民一齊跟隨奮勇向前殺賊  
十餘名賊見官兵勇猛皆拚命飛奔追趕過牛稠  
山後值大雨收軍其南邊遊擊李隆守脩黃象新

等當賊匪來攻即率領弁兵義民放砲打死賊匪  
十數人殺死騎馬賊一人追過八掌溪又被鎗砲打  
死十數人賊隨遠遁東邊遊擊林光玉等俱能奮  
力追殺皆因雨收軍兵丁余振乾等二十八名及  
義民李魏何潘二名被傷斬獲賊首三十二顆奪  
獲鳥鎗砲子長短刀等項生擒賊匪陳光喜黃阿  
進顏鳳等三名審明正法又於二十七日探得南  
路賊匪復聚於離城十餘里之竹林脚龍山脚楓

樹脚一帶地方該處惟竹林脚最為險要易於藏  
奸親統本標官兵義民等進剿由中路火燒莊前  
往竹林脚派令遊擊李隆叅將潘韜等帶領弁兵  
併武舉黃奠邦各義民等從赤蘭埔至龍山脚派  
令遊擊楊起麟林光玉等帶領弁兵併武舉陳宗  
器各義民等由錄蔴散至楓樹脚三路官兵一齊  
進剿賊衆抵死分頭抗拒被官兵鎗砲打死賊匪  
各數十人賊隨敗走由中埔山脚四散逃竄因山

箐叢雜又值大雨收軍兵丁惟陳志朝等三名義民胡阿里等五名受傷生獲賊匪李祥魏滿郭天來陳牛曾老共五名審明正法併獲大旗一桿九龍袋火藥等項奏入

上命軍機大臣傳諭常青李侍堯藍元枚柴大紀曰賊首林爽文糾集黨羽蟻集於諸羅城外之柴頭港竹林脚等處潛圖攔截復分路攻擾縣城看來竟係心恨柴大紀是以專力侵犯其鬼蜮伎倆甚奸狠可惡

至藍元枚於本月初七日在蚶江配渡約計於十三  
四可抵鹿仔港著藍元枚將到鹿仔港後作何調度  
剿賊情形即行迅速馳奏至李侍堯現駐廈門一帶  
離臺灣較近聲息相通且該處地方官自必時有稟  
報所有臺灣近日情形一得稟報即隨時奏聞

上又諭內閣曰柴大紀自駐守諸羅以來賊首糾合匪  
徒屢次攻擾該總兵督率官兵義民奮勇擊殺連得  
勝仗賊匪敗退實屬可嘉柴大紀著交部議敘其隨

從打仗出力之遊擊楊起麟林光玉邱能成守備楊  
彪陳明德署諸羅縣陳良翼武舉陳宗器黃奠邦貢  
監生張明義等著交常青查明具奏候朕降旨議敘  
獎擢以示鼓勵

二十八日

甲午

李侍堯奏言閩省兵額本少所有臺

灣戍兵及調往征兵經去冬賊匪滋擾及本年鳳  
山再失之後傷亡失散者多應及早募補以實營  
伍第臺灣戍兵征兵本由內地各營派往所有缺



額應查明何營何兵之缺方可令原營募補現在各營本有餘丁待缺挑補茲于二月十九日即飭臺灣鎮將查造又屢次檄催嗣據柴大紀與遊擊孫全謀造報前來均係約畧總數內地各營無由知某營缺少若干難以懸揣挑補十四日准將軍常青移送臺灣鎮中軍守備王天植所造清冊前來係就現在府城各營並班滿未回留用兵內所有傷亡病故散失無著各數一一開造俱有營分

及戰守名目可查共四百六十六名臣思常青接  
奉

諭旨自應於義民內接補臣若又令內地各原營補額  
恐致一缺兩補因咨常青於去歲所調征兵內如  
有缺額就近於軍營餘丁或臺地義民接補其舊  
時輪班駐守之戍兵臣即檄飭各標營查照缺數  
速將餘丁內挑補如有不敷再行召募補足其諸  
羅鹿仔港北淡水南淡水各營該備因信息未通

尚難查造應令於大兵進剿道路相通時隨處查  
明造報即照此分別辦理再提臣藍元枚帶兵前  
往鹿仔港其水師提督印務奉

旨令漳州鎮總兵常泰暫行署理查水師提督駐劄廈  
門常泰應即前往該處現有金門鎮總兵羅英笈  
在彼彈壓且地近泉州一切地方營伍事件臣就  
近可以照料惟漳州一帶民情慄悍易於生事並  
據藍元枚訪知會匪多係漳屬之平和長泰等縣

人是該處不可無大員彈壓理合奏明令常泰駐  
劄漳州兼辦水師提督事務轉屬有益再將軍恒  
瑞於初八日在廈門開洋浙兵由蚶江配渡者副  
將琢靈阿帶兵一千於初三日開洋提臣藍元枚  
續帶一千於初八日開洋其最後之一千總兵魏  
大斌帶領亦已在廈門登舟茲探得恒瑞將至澎  
湖洋面被風折回於十一日仍收泊料羅其前行  
各兵船有收入澎湖者藍元枚琢靈阿等船欲沿

海戩駛至金門趁南風斜渡鹿仔港十一日亦因東風甚大寄泊濁滬俱俟風色稍順再行開洋至漳浦械闖一案據報現多畏罪逃匿該鎮道等正在設法緝拏臣料理過兵今已竣事即於十六日起程前往察看情形指示辦理其浮山社許姓藉屍強搶一案已拏獲四十四名提解審訊適撫臣徐嗣曾巡查口岸亦到泉州就近督同藩司各道審辦臣到漳浦查辦械闖之案回至泉州計此案

亦可審有就緒臣與徐嗣曾再行會同嚴訊從重  
定擬具奏再巴圖魯侍衛章京烏什哈達等八員  
於本月十一十二等日先後到泉州十四五日可  
到廈門登舟所需鑼鍋帳房戰箭等項臣先飭中  
軍希當阿預為脩辦交該員等帶用又因臺灣營  
中本無馬匹亦於就近營分挑選驍壯馬每員各  
給三匹以備到彼打仗之用再前撥銀二十萬兩  
分路解往府城鹿仔港兩處以作雇價賑需其泉

厦兩倉現貯之米暫留作兵糧等用今蒙增撥江西米石則閩省軍糈民食均已寬裕所有臺地鄉勇難民等項自須銀米兼放更覺有益除已撥銀八萬兩分解外又先撥米五萬石銀八萬兩各半分解臺灣府城及鹿仔港兩處其鹿仔港內難民一項臣前所買薯乾已解往十萬斤今又買得五萬斤解往搭配米糧均勻散給計府城鹿仔港兩處所有鄉勇既可銀米兼支而難民并有銀米薯

乾三項勻配支放亦俱不致失所再各省脩貯火藥定例於額貯三年數內支出一年操演仍照動支之數逐年委負採買補足本年閩省因預買乾隆五十三年額硝現因臺灣剿匪須用火藥甚多若照例於冬季委負按額採買不免稽遲且不敷所用自應及早多為採買擬即行委負於歲需軍硝一十六萬八百九十斤十四兩零並帶買從前缺硝一萬一千斤外添辦二十萬斤內於山東省



添買十萬斤湖北湖南省各買五萬斤并乘委負  
赴湖南購硝之便帶辦硫磺二萬二千五百斤一  
面行文各該省督撫一俟該貨到日作速催令購  
辦齊全運回應用其動用價值水脚等項俟辦回  
時飭令據實造報核銷再於本月十二日接奉

諭旨令江西碾米十萬石運往福建閩省得此接濟一  
切軍糧平糶等項均屬充裕至此次米石應於何  
處接收以及催船裝載等事飭司道查議據稱江

西入閩之路有三其廣信府之鉛山縣一路有陸  
運四五站寧都州之瑞金縣一路更係山僻小路  
挽運維艱惟建昌府之新城縣由五福地方陸運  
八十里至閩省邵武府光澤縣之上水口即可用  
竹牌及小船剥運此係向來解運銅鉛之大路由  
上水口再四十里至光澤縣又可換大船運至省  
城再用海船裝運至泉廈等因是江西省之米應  
在光澤縣之上水口交兌查五福起岸係江省新

城縣地方僱夫挑運應由江省辦理自上水口僱船及竹牌剥運應由閩省辦理仍各委大員在上水口公同交收所有腳價各歸本省報銷除一面札商江西撫臣確按該省情形如果此路較便即由該處解運臣酌委道府前往接收轉送奏入

上命軍機大臣傳諭常青李侍堯曰現在臺灣調往征兵所有額缺常青自應先於義民鄉勇內擇其奮勇出力者拔補至臺灣曩時輪班駐守之戍兵向例本

由內地各營派往朕思此等戍兵由內地調遣既不免往來繁費而該兵丁等一經調派戍守更不免繫念家室必多顧戀若專用臺灣本地人充補額缺又恐日久該處情形內地不能熟悉亦非萬全無弊之道朕意嗣後此等換班兵丁一半用該處土著一半仍用內地各營抽調派往換班則內地既可稍省調遣繁費又能熟悉臺灣風土人情實為一舉兩得且遊手無藉之徒得以歸伍食糧更可化無用為有用

著常青李侍堯于剿捕賊匪事竣後公同熟商遵照辦理又昨據林小文供稱天地會名目上年係林爽文倡起由臺灣而至內地等語林爽文設立天地會名目糾約多人肆行不法且現據藍元枚訪知會匪多係漳屬之平和長泰等縣人是林爽文不但窺伺臺灣並欲勾結漳泉一帶蔓延滋擾顯有先得臺灣便可漸入內地之意甚為奸險可惡但此時不可遽行查辦以致人情驚擾至將來剿賊事竣後常青李

侍堯務將結會之根由及附從入教者詳悉查明痛  
加懲創不可稍留餘孽再恒瑞藍元枚帶領滿兵浙  
兵於初八日開洋後被風折回朕心深為焦急著李  
侍堯即將恒瑞藍元枚究於何日得風過渡之處迅  
速具奏其漳浦縣強搶械鬪兩案既已獲犯多名提  
解審訊當以速行審辦完結為要至漳州鎮總兵常  
泰已令暫署水師提督現在漳州正需大員彈壓自  
未便即往廈門遽離該處朕於披閱摺片之初即行

批示後見該督奏明令常泰駐劄漳州兼辦水師提督與朕意脗合所見甚是至本日柴大紀賫摺把總鄭士勝來至行在隨令軍機大臣詢以該處情形應對尚為明晰並據稱曾隨柴大紀在諸羅與賊打仗數次看其人尚明白奮勉著常青即將鄭士勝拔補千總如將來該弁回至臺灣再能出力即擢授守備亦無不可

臣等謹案臺灣駐守兵丁向例由內地輪班而往

此番因正值剿匪之時未及遽行更替我

皇上以戍卒遠涉重洋不免繫戀家室專用本地民人  
充補又恐該處情形內地無由熟悉因酌為兩用之道不  
特稍省調遣之繁無令遊手無藉之徒皆得食糧  
歸伍地方更可陰受其益曲體人情隨宜措置  
聖照所周迥非淺慮所能計及也

上又諭內閣曰常青自抵臺灣即慰撫義民鄉勇俾伊  
等共知激勸用命爭先至賊匪攻犯府城預先設法



防堵並督率官兵鄉勇迎捕截殺屢次克捷甚合機  
宜朕心深為嘉獎常青著交部從優議敘至李侍堯  
駐劄廈門一帶照料官兵配渡迅速辦理軍需糧餉  
均能先事預籌源源接濟孫士毅挑餉粵兵遄赴閩  
省所有火藥鉛彈等物均能寬裕籌備解送應用皆  
屬急公可嘉李侍堯孫士毅著交部議敘

二十九日

未

上命軍機大臣傳諭常青李侍堯曰將來剿賊事竣柴

大紀屢著勞績自應即實授提督但該鎮任臺灣總兵已經數年該處情形較為熟悉且領兵剿賊屢次克捷威望較著即日賊匪蕩平所有善後事宜皆須該鎮隨同常青悉心籌辦而臺灣經此次賊匪滋擾官兵平定之後尤宜加意整頓若將柴大紀授為提督則須駐劄內地臺灣即無熟手經理之人朕意將來事竣後應令柴大紀以提督管臺灣鎮總兵事務在彼彈壓料理二三年再調回內地於綏靖地方更

為有益所有內地提督負缺著常青李侍堯於梁朝  
桂陸廷柱二人中察其才具並何人最為打仗出力  
之處酌舉一人可以署理提督者據實具奏至常泰  
現署提督留駐漳州雖未經領兵打仗如量其才具  
堪勝提督之任並著一併奏聞候朕酌量簡署至臺  
灣遠隔重洋屢有械鬪搶奪之案今林爽文等竟敢  
立會糾衆刦縣殺官自係歷任道府廢弛閭冗擾累  
地方以致養癰斂怨激成事端不可不嚴加治罪以

倣將來著傳諭常青李侍堯於剿賊事竣即將歷任道府嚴切查明據實叅奏

三十日

丙午

上命軍機大臣傳諭常青李侍堯曰朕披閱藍鼎元所著東征集係康熙年間臺灣逆匪朱一貴滋事官兵攻剿時伊在其兄藍廷珍幕中所論臺灣形勢及經理事宜其言大有可採如所稱諸羅一縣地方遼濶鞭長莫及應劃虎尾溪以上另設一縣分駐半線地

方並於各要隘處所增添巡檢千把總弁以資防守等語後從其說添彰化一縣至該處迄今又閱六十餘年土地日闢戶口日滋酌量情形有須添設文武弁弁以資控制撫馭之處前經降旨令常青李侍堯於剿賊完竣辦理善後事宜時一併籌酌今閱藍鼎元彼時即有此議是臺灣增設官弁實為最要又覆閱總督滿保經畫疆里一書內稱臺灣地方地土廣饒糖穀之利甲天下過此四五十年即內山山後

皆將為良田美產若劃定疆界將人民驅逐不許往來耕種勢難禁止等語所言亦屬有理臺灣疆土既開民安耕鑿處處成膏腴之地自楊景素議立界限之後則界外良田美產轉畀生番而生番以射生為業不事耕種勢必內地民人仍往偷墾日久徒滋事端是定立界限究恐不無流弊又與提督施世驃書內稱賊衆至三十萬其中畏死脅從非盡出於本願或有掛名賊黨以保身家者若盡誅之多殺生靈亦

屬無益似應止殲巨魁反側皆令自新等語現在林  
爽文糾合匪衆所到村庄以勢迫脅如有不從者即  
行焚殺小民畏死偷生出於不得已勉強附從以致  
日積日多前後自出一轍朕於此事初起時即經降  
旨諭令該督等惟將渠魁首逆及實在黨惡不法者  
皆應殲戮無遺其被賊迫脅出於無奈聽從者准其  
悔罪自新以解散賊黨藍鼎元之語適與朕意相合  
常青於整齊兵力進剿時不妨先將此意出示曉諭

使被脅良民及從賊夥黨得以畏罪投誠亦解散賊黨先  
聲奪人之一法此外書內所列各條尚多可採者藍  
鼎元籍隸漳浦所著東征集閩省通行者必多著常  
青李侍堯即行購取詳閱於辦理善後時將該處情  
形細加察核如其書內所論各條有與現在事宜確  
中利弊竅要者不妨參酌採擇俾經理海疆事事悉  
歸盡善以為一勞永逸之計



欽定平定臺灣紀畧卷十九